

■ DIS DA LITTERATURA

Datti pajais surreals?

La retscha Litteratura retschaiva ina nova ediziun, deditgada al tema «real – irreal – surreal».

N'exista la Svizra betg, perquai ch'ella n'ha nagin retg? L'Engalterra pudess esser surreala – ma tge pajais fissan lura sut-reals? Quai sa dumonda Walter Rosselli en ses text davart pajais reals ed irreals. Iso Camartin sa dumonda, schebain la musica saja in art che supportia elements surreals, e *Tina Planta-Vital* s'inscuntra en sia poesia cun ils antenats che passan sper ella vi.

Quai èn be trais exempels dals differents texts che cumparan en la nova Litteratura nr. 34. Sin 166 paginas han lecturas e lecturs ina schelta da texts da different gener – lirica, prosa curta, chanzuns ed essais – che sa deditgeschan al tema principal. La Litteratura cuntogna dentant er anc auters texts, sco p.ex. ils texts prelegids l'onn passà a la concorrenza litterara per il «Premi Term Bel» a Domat. Latiers reflectescha l'autur *Görr Klainguti* davart la dumonda, tgenina che saja buna litteratura e prenda posi-



ziun envers la discussiun da la giuria pertutgant ses text «Che am dian las unglas dals peis». Ultra da quai sa regordan *Mevina Puorger Pestalozzi*, *Arnold Spescha* e *Benedetto Vigne* dals auturs de-

functs Lothar Deplazes, Vic Hendry e Gion Peder Thöni. Per illustrar la Litteratura vegnan dumandads artistas u artists giuvens. Quest onn pon ins vesair en la Litteratura serias surrealas dad «Inventars da vadrets», stgaffids da *Flurina Badel* e *Jérémie Sarbach*.

La retscha Litteratura, edida da l'Uniun per la Litteratura Rumantscha, cumpara dapi passa 30 onns. Igl è in organ da publicaziun ideal per persunas che scrivan gugent e che tschertgan ina furma da publitgar lur texts per entrar en barat litterar cun auturas e lecturs. La lavur redacziunala per l'ediziun nr. 34 han procurà *Uorschla Natalia Caprez Brülhart* e *Hubert Giger*.

En il rom dals Dis da litteratura a Domat vegn la nova Litteratura preschenta sonda, ils 7 da november, a partir da las 16.30 en la Sala Tircal. Retrair pon ins il cudesch tar las librerias ubain sur www.litteraturarumantscha.ch.

Uniun per la Litteratura Rumantscha